



ATASSUT

Steen Lynge

UKA 2015/34

24.11.2015

Apeqquyteqaat aallaavigalugu Kalaallit Nunaat suli minguinnerusq Inatsisartuni oqallisissiatut siunnersuutigineqarpoq.

(Inatsisartunut ilaasortaq Anders Olsen, Siumut)

Siullermik ATASSUT sinnerlugu Inatsisartunut ilaasortaq Anders Olsen Siumumeersoq qutsavigissavarput taama soqutiginariginartumik imartuumillu apeqquyteqaat aallaavigalugu oqallinnissamat siunnersuuteqarmat, tamannalu ATASSUT-mit ima oqaaseqarfigissavarput:

ATASSUT-mit pingaartitarivarput avatangiisitta qajannaqisup paarilluarnissaa – inuuffigaarpummi inuussutissanillu aallerfigiuarlutigu. Taamaattumik ATASSUT-mit aamma iluarisimaarnarpoq Naalakkersuisunut ilaasortap akissuteqarnerminni Naalakkersuisut aamma pingaartitsineranik suliniutit maanna ingerlanneqalereersimasut pilersaarutigineqartullu assigiinngitsut saqqummiussormagit.

Siunnersuuteqartumit aammalu Naalakkersuisunit saqqummiussorneqareersut assortorneqarsinnaanngitsut maani uteqqissanngilakka, taamaattorli taakkununga tapersiilluta ATASSUT-miit suut aamma eqqumaniarfigineqarsinnaanersut tikilaarusuppavut.

Siullertut ATASSUT-mit pingaartillugu tikkuarusupparput arlaatigut sumiluunniit allannguuteqarluta pitsanngoriaateqassalluta aaqqiissuteqarniarnermi, periuitsinik nutaanik aallartisaaniarnermi pingaaruteqarluinnartut arajutsineqakkajuttoq tassaammat: sulisunik sungiusaaneq ilinniartitsineq!

Tamanna aallarniutigerusupparput pingaaruteqarluinnarmat pissutsit allanngortinneqassappata aamma allannguinnissamik ingerlatsisussat tassalu ulluinnarni ingerlatsinermi sulisuusut, tassaasinnaapput eqqaavilerisut, nukissiorfilerisut, ikuallaavilerisut allallu pisortat suliffeqarfiutaanni sulisut akuutinneqarnissaat minnerunngitsumillu aamma atortorissaarutit nutaat pilersinneqaraagata sukumiisumik sungiusaanerit ilinniartitsinerillu ingerlanneqartarnissaat. Taama aallarniutigalugu oqaaseqarnitsinnut ilaatigut tunngavigaarput sineriyak tamakkipajaarlugu illoqarfinni nunaqarfinnilu ukiorpaaluit matuma siorna ikuallaavinnik pilersuisoqarnikuungaluarimat, ullumikkummita qassit atorneqarmat?



Aatsitassarsiornermut atatillugu eqqagassalerinermut mingutitsinninnissamullu malittarisassat atoqqusaasut minnerpaamik aamma nunatta sinnerani sumiiffinni tamani atuuttinneqartariaqaraluarput – ilumut pisariaqarluinnarpoq sukumiisumik eqqaavilerinerup nakkutigineqarnerulernissaa, innuttaasunummi peqqissutsip tungaatigut qanoq sunniuteqarsinnaaneri aamma ilisimaneqaqqissaartariaqarmata – pingaartumik sumiiffiit ilaanni ikuallaaveqarfiunngitsuni eqqaavissuaqaannarfiusuni.

Pisortammi soqutiginnippatigut eqqagassat qanoq pineqassanersut, taava aamma taanna soqutigisaqannginnersuaq innuttaasut pissusissamisuuinnarsoralugu attatiinnassavaat – pisortat maligassiunissamut tunngavissisussaapput!

Pingaarteqarluinnarpoq piujuartitsinissamik eqqarsassagutta nunatta aamma minguitsuutinnissaata pingaernerutinnerusariaqarnera. Nukissiuutinut ilaatigut tapertaalluarsinnaammaat, illoqarfiit nunaqarfiillu salingaatsuutinnissaanut pingaarteqarluinnarlutik. Tassani ATASSUT-miit Naalakkersuisunut kaammattuutigissavarput nuna tamakkerlugu eqqagassalerinermut atatillugu sullissinerup ataqatigiissarluarneqarnissaanik kommunit qanimut suleqatiserineqassasut.

Nunatta issittumi inissisimanagera aamma avatangiisitta qajannassusianut apeqqutaasorujussuuvoq, taamaattumik aamma ATASSUT-mit isumaqarpugut nunat issittormiut avannarliillu qanimut inerisaanissamut suleqatigineqarnerisa suli inerisarneqarnerusinnaaneri sulissutiguarneqartariaqartoq. Nunanimi issittuni qanoq nukissiuutit ataavartut atorneqarlualereersimasut misilittagaqarfigilluarneqartullu suleqatiginerusariaqarpavut, nunatsinni pissutsinut tulluarnerusunik naleqqunnerusunillu aaqqiissutaasinnaasunik pissarsiniarnissaq eqqarsaatigalugu, ilaatigullu aamma ineriartortitsinissamut aningaasaleeqataasinnaassuseqartunik peqateqarnissamut aqqutissaalluarsinnaasarmat.

ATASSUT-mit aamma isumaqarpugut Issittumi Teknikkikkut Ilinniarfik, ARTEK suli annertunerusumik inerisarneqarsinnaasoq nukissiuutinik ataavartunik atorluanaanissamut, taamatut nukissiuuteqarnermut tunngasunik suliffeqarfissuarnik suleqateqarnikkut minnerunngitsumillu aamma nunani issittuni nukissiornikkut ilisimatusarfinnik suleqateqarnerup inerisarneqartuarneratigut, sulilu aamma annertunerusumik nunatta nukissiuutinik ataavartunik inerisaanermi misileraaffigineqarsinnaanera inerisarneqarsinnaalluni.

Tassa nunarput periarfissarpasuaqarfiuvoq, nunattali isorartunera avinngarusumasunilu inoqarfeqarnera akisusinnaasarmat ATASSUT-mit pingaarteqarsorivarput nunatta avataaniit aningaasalersueqataasinnaasunik suleqateqarsinnaanerpup eqqumaffigineqarnerunissaa.

Tassaapput matumani ATASSUT-mit oqallinnermut tapersiilluta maannakkut ilanngukkumasavut.